

# AZTEC FANTASY A IMPRESIONA

**ORANJESTAD(AAN):** Un grupo di carnaval cu na San Nicolas sigur a causa impacto grandi tabata America - Aruba cu **"Aztec Fantasy"**.

E grupo aki ta consisti di Arubianonan cu na principio y meymey di añanan 60 a bay residencia na Merca y casi tur na New York.

Annualmente nan tabata bin Aruba pa hunga softball bao direccion di e conocido Roy Gibbs y despues conoci bao di number di Roy & Roy ya cu Roy Richardson a cumenza coordina e viajenan y actividadnan hunto cu Roy Gibbs.

Eña aki e grupo a combina nan weganan deportivo di softball na Aruba cu Carnaval.

Roy Gibbs y Roy Richardson a presenta na pueblo di Aruba un grupo di Carnaval manera Aruba tabata conoce for di 1948 cu e prome grupo dirigi pa Calvin Assang, a sali caya pa celebracion di 50 aña riba trono di Reina Wilhelmina, cu trahe di carnaval den **"Arabian nights" cu steelband di Shu Shu Baby.** (E grupo di Assang a subi caya prome

**biaha na 1946 pa celebra fin di guera).**

Publico a ser recorda riba salidanan di gruponan di Woodley y Chipi na principio di añanan 50 y salida di grupo di Sidonia Muller (q.e.p.d.) mey mey di añanan 50.

E sistema di presenta un tema, den un of dos tipo di difraz, cu un Queen of Band y un King of Band di e grupo, e shuffle di pianan y e bulamento riba ritmo na dado momento combina cu e coreografia di cambianan masha bunita, a impacta tanto na San Nicolas como na Playa y durante henter ruta nan a ricibi masha aplauso.

E premio gana na San Nicolas di **"Comendable mention"** ta bisa tur cos. No solamente ta recomendable menciona e grupo aki den e grandinan, pero tambe ta un recomendacion pa forma grupo den tal sentido pa futuro.

Na Playa nan a logra premio di **"Special Fantasy"**. Un grupo cu tabata Special den parada, imponiendo cu nan estilo y presentacion.

